

六

天文
星野
氣候
地理
公署
名勝

占驗
災祥
城池
祠廟
山水
沿革

平遠州續志卷之一

天文志

周禮保章氏掌天文而黔省未載分野平陽地屬
葦爾又何有星野之可言乎然郎官應乎列宿時
變察乎天文先事預防正可觀天象而盡人事以
補之也故首稽星野而以占驗氣候祥異附之

星野

按一統志曰宣慰司參井分野東山謝氏因之是
平遠分野在參井自陳氏卓謂牂柯入參五度黔

志亦載貴州入參水猿五度舊志遂以平遠專爲
參星分野無疑可謂至當顧或曰參井本屬周秦
韓魏分野自夏禹八年甲子至道光十六年共三
千九百九十二年已差五十餘度今之參井非昔
時之參井矣徐氏圃臣言天度有差地度萬古不
動作天元厯理及復古分野圖其言分野也曰漢
沔以南巴蜀邛笮以及滇野交緬皆屬之翼軫圖
中復分翼爲雲南軫爲貴州是黔之分野在軫而
不在參井據此則平遠當占地度軫宿矣附誌之

以俟考

附占驗參星

參宿十星一曰參伐一曰大辰一曰天市一曰鈇
鉞主斬刈又爲天獄主殺伐又主權衡所以平理
也又主邊城爲九譯參白獸之體其中三星橫三
將軍東北曰左肩主左將軍西北曰右肩主右將
軍東南曰左足主後將軍西南曰右足主偏將軍
故黃帝占星參應七將軍中央三小星曰伐天之
都尉也三胡鮮卑戎狄之國凡十度右足入畢十

三度去極九十四度參旗九星在參西一曰天旗
一曰天弓主司弓弩之張 玉井四星在參左足
下主水漿以給厨 軍市十三星在參東南天軍
貿易之市使有無通也

氣候

天地一元之運爲十二萬九千六百年分而爲十
二會會分而爲三十運運分而爲十二世世分而
爲三十年年分而爲十二月月分而爲二氣氣分
而爲三候候分爲五日日分爲十二時積四千三

百二十時三百六十日爲七十二候會者元之候也世者運之候也月者歲之候也氣者月之候也月證於月者也氣證於氣者也候證於物者也若孟春月其氣爲立春爲雨水其候爲東風解凍爲蟄蟲始振爲魚負冰獺祭魚之類月令諸書可考也氣候之運行雖出於天時實關於人事故郵治之世天無疾風育雨之愆地無昆蟲草木之孽平遠僻處遐方冬無嚴寒夏無酷暑瘴癘全消毒霧不作惟東作稍遲則苗不茂夏初無雨則收必歉

入秋或遇風雨或遇天晴則秀不實栽耕收穫其
氣候同於他郡四十年殆與舊志無異云

祥異

道光三十年夏月華

同治六年秋 聖宮庄田戈仲烏一穎三穗是科
胡承銓楊晉樞羅詠春三人皆膺鄉薦

同治八年 聖宮枯桂老幹發花是年中文舉謝

漸達

同治十一年中秋月華

同治十二年 聖宮枯桂重花是科 謚厚熹趙光
表張汝楫謝鍾良鄉試中式

同治十三年十月中月華

光緒八年 聖宮丹桂重開是科 文武鄉試趙永
安朱奎光中式

光緒三年丁丑穀生雙穗

光緒十四年大有年

咸豐元年夏太白屢經天

咸豐四年彗星見

咸豐四年冬城中潭水皆濁踰月楊逆入境

咸豐元年二月豹入城河頭上狎匪作亂

咸豐十年八步地泛漲水十餘丈經數月始消

咸豐十一年長星出竟天

同治三年有白蛾數萬由東而西何逆入境

同治三年十月內日中無風有槐葉成團自南而

北墜葉十三張苗逆卽圍城十三日始去

同治三年白虹見長星見於西方似蛇形逾時始

散

同治四年大疫太饑

同治五年白氣見於東大饑

同治九年冬南關外火

同治十三年夏五月彗星見

同治十三年冬白虹見於西南

光緒元年三月中隕霜

光緒元年五月五日地震初六日潭水濁逾時即

清

八月十六日隕霜殺稼

冬十一月朔雷電雨雹會匪吳玉堂等謀逆伏誅
光緒八年八月蚩尤旗五更見於東南長丈餘
寬數丈

光緒十三年五月大水秋蟲蝕稼歉收
光緒十五年夏旱秋雨山土歉收

平遠州續志卷之二

地理志上

平邑萬山屏列一水環周據輿圖之形勝設郡以來凡所建置率因其舊前志載之詳矣嗣經兵燹城池僅存各建造不無殘燬肅清旣告善後條舉厯任職守及經事紳董廢者修缺者補漸復舊觀爰條誌之以俟後之作者絡續舉行庶幾臻於美備其山水之鍾毓靈奇者補誌於後

城池

同治十三年知州錢堦領款重修五門城樓額題
東曰寶日南曰韶和西曰寶成北曰望華小東曰
登春東南城角建石礮二所

光緒十三年知州黃紹先請款重修南水關時平
遠疊遭水災惟東城最低水每壓城而過且豺狼
多出關出入州人苦之乃請款重修

公署

光緒十四年知州黃紹先重修署內廳宇顏曰廣
廈其跋云

杜工部詩云安得廣廈千萬間大庇天下寒士共
歡顏余嘗讀是詩愛之念工部彼時未嘗臨民尙
孜孜以民瘼爲心親民者當復如何余以去年來
牧是邦見署側有廳宇一間甚湫狹且樑棟悉將
傾圮每接見官紳殊不足開暢懷抱爰捐廉築石
開基卽舊址而推廣之約費數十金不旬日告成
金碧流霞簷牙高喙較前規制廓如矣題其額曰
廣廈公餘退憇於斯靜念蹂躪殘區民生未遂何
以遂居未安何以安覩額警心未必非集思廣益

之一助云

祠廟

岑公祠

光緒七年建在倉聖閣東廂

徐公祠

咸豐二年建在書院右側

鄭公祠

雹神祠

光緒十六年知州黃紹先新建

炎帝廟

前殿燬於火光緒二年知州錢重建知州黃紹先移建正殿併建戲臺

關帝廟

同治九年知州陳昌言重修正殿及後宮光緒二年舉人譔煥模補修

城隍廟

舊制毀壞不堪知州黃紹先籌款率紳士重修

關帝廟

建於歟塚渡經賊毀光緒元年提督陶茂林倡捐重修

文昌閣

光緒九年舉人謝鍾良勸捐重修

奎閣

舊制毀壞不堪紳士譔金壽倡首籌款重修

玉皇閣

州人公修前靈官樓

文峯閣

州東關外東山頂舊制毀光緒十六年知州黃紹先率紳重修

斗姥閣

從九譔劊模勸捐重修

觀音閣

建於穿洞關經賊毀光緒元年提督陶茂林捐修

萬壽宮

乾隆六年江西客民重建於南關外後改建於東城內水關側

三楚宮

乾隆五十六年湖南客民移建南城內光緒元年駐防提督陶茂林葺修

惠民宮

在南城內同治十一年知州陳昌言率州民延修

天駟宮

在四關外賊毀光緒七年合營官兵重建

東山寺

州峯關外毀於練匪楊有才今重修正殿

隆興寺

州東關外又名水月菴毀於賊光緒二年知州錢璵重修正殿十四年寺僧募修下

殿規模復舊

西靈山

州西關外毀於賊今重修

漁山

州小東關外毀於賊今重修

紫竹菴

州南關外毀於賊寺僧募化重修

廻龍菴

舊制毀壞不堪合邑士民重修正殿

靈應菴 在龍王廟側寺僧募化重建

財神廟 舊制毀壞不堪合邑士民重修

得月樓 舊制毀壞不堪合邑士民重修

水利

同善橋 知州錢堽重建修有序載藝文

大堰 五里光緒元年知州錢堽重修小堰
在其下

善願橋 南關外監生羅克珍倡捐眾成之

黑魚洞堰 州南十五里南方水田皆資灌養

城邊堰 二堰俱用水車引水

平遠州志 卷之二
白家堰

馮家堰 州西六十里

沙派堰 州東二十里知州錢堦籌款興修

名勝

忠義總坊 在南門外

節孝總坊 在北門外

花牌坊 在東門外爲節婦譚胡氏立

文明坊 前經賊毀光緒十五年知州黃紹先重修
題曰南天鎖鑰副將阿明阿又題曰金湯

永固 在南門外珠市埧

德配天地坊

二坊均在聖廟門外

道冠古今坊

德政坊 在南大街爲知州劉宗元立

心堅金石坊 東門外半里許爲劉烈女立

松操栢節坊 在牛場爲節婦丁王氏立

貞壽之門坊 在州署前爲百歲婦田陳氏立

期頤偕老坊 在南門外里許爲百歲壽民熊永祚夫婦立

以上八坊今俱存

山水

青龍井

州北一百里木札黑冬溫夏涼中有五色魚

雙龍石

州北一百里木札黑二龍一鉅一細頭角宛然

和尚井

茶店水自石洞流出其音如磬相傳有遊僧來井取水合藥濟人病者德之因名

串珠井

州北七十里茶店井底湧泉纍如貫珠

魚梁

州西十餘里敦十甲石橫水中如堰魚每迎流躍上土人擬之龍門云

鵲朝山

城西十里高出羣山頂平多樹其葉常青每日昏羣鳥皆集

龍潭壩

城西十五里有平原廣約半里中出九潭不盈不涸

石傘洞

州西太一甲洞有石如傘土人以其燥潤占晴雨

雙龍山

州西十五里兩峯對峙爲州城聚脈之所

犀牛脚

州北木札黑石上一牛蹄迹廣約尺餘下

形端表正亭

光緒元年知州錢堦建

瑞紅亭

在圭峯頂其路先由大壩右側順倉而上

州名勝行徑必取清潔不宜雜以塵囂合工以
白石爲磴道紆廻曲折至山半三分又達於圭
峯或如羊膻或如鳥道其險峻處又如石棧天
梯沿途隙地廣植各種花木前修牆垣以護之
又以山頂一覽亭毀重

建此有記載藝文志

碧琉璃精舍

城東北漁山今毀

三
海
人
子

卷
一
一

一

平遠州續志卷之二

地理志

下

沿革

從來山川疆域皆有一定之程前志已詳其續如
修舉者補入今志惟地方沿革治亂興廢所關非
考核精詳不足信今傳後平遠置郡以來三百年
於茲其間禮樂文章卓然大雅桑麻并牧馴至可
封乃自乙卯以來楊逆首禍繼是而腥羶迭跡燹
煜皴皴百里平陽幾無一寸乾淨土雖紅羊大劫

胥由天數抑未始非人謀不臧致之也前事不書
奚昭勸懲爰取趙君光表等所採爲之詳其畧別
其冗考之通志以求其全參之百家訪之故老以
核其實叙而不斷用附地理志中以備一隅般駘
可耳

大事考

蜀漢

建興三年丞相亮南征濟火積糧通道封羅甸國王

唐

會昌中阿琨率土內附仍襲王爵

天成二年普露率其九郡入貢襲封如故

宋

開寶中封普貴王爵

以入貢故也

元

至大元年授阿畫武畧將軍順元守尉使秦定間賜

名帖兒不花

至順元年加資政大夫雲南行省左丞後以軍功授

昭勇大將軍佩三珠虎符加龍虎侍衛大將軍
元等處宣慰使錫羅甸侯職卒贈濟國公

明

洪武四年賜霽翠宣慰使統四十八部

奢香獻龍場九驛

奢香霽翠妻也翠死香代立時都督馬晬欲滅之
因事庭辱香欲激其叛而加以兵香懇於上願獻
龍場九驛通黔蜀道上爲誅馬晬封香順德夫人
正德中加安貴榮參政後世襲宣慰使職

以征香爐山功也

天啟二年安邦彥反巡撫王三善討之師潰死內莊
逆目安邦彥挾侄安位叛巡撫王三善率民十萬
並總兵馬燭等百二十員直抵大方次年四月
盡師旋次內莊遇伏師潰三善死之全軍盡沒
崇禎二年安邦彥伏誅築比喇城旋毀

安邦彥誅後土目化沙臥這爭襲各獻地土請設
流官總督朱燮元築大方比喇水西三石城以副
將方國安鎮之未幾化沙復叛圍大方國安誘斬

之潰圍出其城盡毀

國朝

順治十八年賜安坤宣慰使印

經畧洪承疇征滇坤引大兵由小路進滇黔底定
叙功賜袍帽並印信

康熙三年安坤反吳三桂討之伏誅

時僞匡國公皮熊藏安坤家開造軍器謀爲不軌
以土目安如鼎總其師

上命吳三桂討之擒坤及如鼎誅之皮熊不食死

四年設平遠府鎮及文武職官儒學

以邱業爲知府劉文進爲總兵設學正訓導各一員文武學生各十五名

十一月隴韋阿沮叛遊擊侯才討誅之

阿沮叛才率兵奮勇衝鋒身先士卒擒誅之城
以全

五年兵變巡撫定之

七年改鎮爲協

十九年歲大饑斗米值銀三兩

二十三年裁平遠府爲州

時黔西大定均改州隸威甯府後威甯亦改州仍設大定府平遠隸之

二十七年修學宮

初設府時所建學宮皆草創旋毀於兵至二十五年學正吳以仁修建正殿二十七年知州李文熙劉濬學正田祖復捐修規模始備

四十一年知州鹿聰豫初修州志

初志爲知府邱業所輯然地經初闢事迹畧甚施

經兵燹遂毀知州俞九成纂之均未成書至是始
備

乾隆十三年知州郭振始建石城

振領帑金一萬八千餘兩於是年正月動工至次
年十一月報竣高一丈周圍八百二十六丈城外
壕深一丈寬一丈二尺建城樓於各門視前之木
柵迥不侔矣

二十年知州李雲龍始修書院

前知州冷宗昱改義學爲書院後知州蘇松重修

皆傾圮僅存舊址至是李雲龍捐俸建修改名
陽

二十一年重修州志

知州李雲龍以學正劉再向等爲纂輯

四十一年分地設水城廳

州初設九里至是以邊鄙寫遠分崇信時豐巖爲
三里及大定府二里合爲水城廳並分文武學生
各三名爲廳學

嘉慶二年苗變知州周景益定之

南籠狎逆韋朝元叛各鄉苗民俱煽動不靖知州
何景益與副將胡坦四下安撫並飭守備張雲鳳
營員李友良莫天民黃藩李如春紳士譔克述
張瑄士守備楊彪士千總安文德各帶兵勇數百
捕倡亂者誅之數月始定

改平陽書院爲鳳西

知州周景益以院在鳳凰山之西故名

道光二十六年知州徐豐玉重修書院

時書院規模雖具而膏火無出知州徐豐玉

廉二百金派紳士勸捐城鄉樂輸者衆共得一千
四千五百有奇乃增修齋房定膏火並賓興試
諸款規模頗備州士人咸仰賴之

十月重修州志

舊志已百餘年世事日增知州徐豐玉延翰林院
檢討譔厚光暨舉人張鈞李國勳纂修

咸豐三年癸丑知州周守正增補城垣並五城門

冬毛粟園蕭三等作亂

毛粟園大定屬地在平遠北盜藪也土豪蕭三等

雄踞其間附近苗夷皆屬焉與城內棍匪楊冬二
水天福等密爲不軌推城隍廟僧普潤爲主盟盜
魁李拱三黃大五等爲羽翼時有梅某者誑言得
異人授善步天星知禍福楊冬二等信之推爲僞
軍師密招蕭三弟兄約舉事蕭三初尚猶豫冬二
惑以幻術使僧宿室中密以硫磺燒酒暗然其衣
給蕭三窺焉初無覩繼忽紅光滿帳照耀一室蕭
三等遂惑之暗於四下招人部署已定期於除夕
起事冬二等未動之先承平日久或有洩其謀者

輒叱爲訛言至期蕭三等果率數百人起行臨上馬被蹶傷腹懼而中止

甲寅四年春知州周守正捕蕭三等誅之

時逆謀甚急附近苗夷陰知之移徙以避二月中鄉長某密以聞周牧即飛稟大吏奉飭會營弁往捕之蕭三與水梅二逆皆就擒惟冬二及僧匿無踪時大定府楊守書魁聞報馳至平謂周牧曰此案律以叛逆株連必眾誅其元惡可也乃斬蕭三弟兄並水梅逆等示眾飭役捕獲楊逆及僧於鎮

甯伏辜其繫累者釋勿坐

冬十月楊漚洗竄擾東南河口在籍翰林院丁寶楨
毀家禦賊

初楊漚洗叛桐梓隨踞遵義雷台山官兵破之遁
黔西沿河俱從之別其名曰在緣時阮文藻斂平
賊漸逼城中守備尙寂然丁寶楨時以庶常歸里
見賊勢日獗乃募勇捍東南河口賊入境屢敗之
賊不敢進民賴以安賊遂由他路竄六歸河等處
楊漚洗由六歸河入境知州周夔敗之

時防兵爲賊敗潰入城賊濟河紮青岡塘及茶店
猓龍橋陳三等從逆受僞職謀遣輕騎攻城時阮
牧病不視事紳耆等以賊勢逼謀請援謁阮牧不
納曰吾老矣期一死報國耳人心愈惶舉人張鈞
胡承義李國勳與教職李楸崧王金誥商以學正
印賈文遣胡承錫告急撫軍異之急傳詢且謂此
守土者之責紳民何越俎承錫備陳情勢詞旨慷
慨撫軍動容乃委員周夔查辨至平賊距城南數
十里鄉民避入城者益眾夔帶藩練二百與賊戰

於猥龍橋敗之事聞 上憲錄夔功卽委牧平復
命松桃營都司祥福率兵五百來援次於則溪塘
賊勢奪夔牧平後整飭武備聲威大振且援兵日
集賊遂不敢窺城

十二月鄉紳謝玉階合團禦賊

時鄉愚惑於教匪紛紛投賊玉階奉札合八步村
寨爲團諭以從逆之害民悉聽之團內千餘戶無
一人從賊者嗣隨大軍勦撫乾壩鷺項嶺地方屢
有捷獲

乙卯春賊襲以那架鄉紳陳謨敗之

以那架鄉紳陳謨聞賊至嚴陣場上以待賊趨場率鄉勇等奮擊大敗之斬首百餘級賊遁

三月楊滙洗遁走郎岱知州周夔追敗之

時賊分股圍畢節大定者俱敗楊逆乃由間道走免場竄入郎岱界周牧統練尾追與賊戰於大巖脚周牧親冒矢石士卒無不以一當百遂大敗之是役也陣亡文生高煜

五月知州周夔率土都司安紹緒越境勦狃匪於密

蜂壘紹緒死之

蜜蜂壘在州南百餘里安順屬也時爲狎匪盤踞周夔乃率土都司安紹緒攻之不克紹緒陣亡

六月沈士良署平遠州事越境勦狎匪於扁担山

沈牧忠勇性成不分畛域甫接事一月以狎匪盤踞安順之扁担山遂以勦滅爲己任自捐資招練數百會安順府進勦

七月知州沈士良追狎匪於老鴉石遇伏死之

狎匪雖猖獗沈牧與戰輒勝追及老鴉石遇伏眾

潰把總張玉章力戰不得出沈牧呼曰玉章男兒
死耳遂同遇害聞者皆流涕安順士民立祠祀之
四時不懈

丁巳十一月知州鄭訓達減定糧價

達牧平實心實政時兵燹頻仍民困有聚爲盜者
乃親歷各里察民隱知歷年開徵差役下鄉需索
徵銀倍於正供民苦之鄭州牧遂稟各憲定以每
斗收銀一錢八分四厘刻石以紀民大悅

戊午八年冬興文里周立本等作亂殺團首黃嘉和

等知州毓崐討誅之

黃嘉相與文里巨族也富甲一方團內有周立本者自下游充練歸與宋二芋頭宋加官謀爲亂勾合沙鍋寨賊首黃么寸子黔西楊三大頁約二百餘人於冬月竊發陽赴下游勦賊過虎場乘勢作亂團首黃嘉相遣使偵之且囑其繞道立本等酒正酣大恚曰爾尙欲以平日勢凌我耶立鞭其使翌夜擁眾至寨嘉相出門叱之遂遇害其子庶卓聞難攘臂出家人勸之逸庶卓泣曰我不獨生也

奪劍砍賊賊殺之同時生員黃嘉猷徐文源等七
人均被難財物盡爲所掠立本欲率眾更劫虎場
么寸子等頗恐却之曰我輩初意只圖劫財物耳
今殺戮至此我不能從若反也即乘夜分散去時
大雷虎場人皆冒雨驚避至次日始集團尋之立
本等猶帶數十人踞獐猪寨與團相拒團眾不敢
逼幸炮斃賊首一乃驚潰州牧毓岷聞報馳至派
團分捕獲宋周及餘匪二十餘人均伏誅

己未九年四月河頭上狎匪作亂知州毓岷率兵圍

勦之不克團首趙克勦世職羅玉發等陣亡

河頭上距城南百里中踞狎匪頗蠢動劫殺行旅
兼擾各鄉寨知州毓岷會都司何雲章帶兵練與
團眾千餘人合安順府周夔勦之毓岷屯喜樂坪
趙克勦等率團直紮河岸鎗炮達賊巢惟無營壁
不虞其能我襲也賊屢受鎗傷一出入飯食俱悖
慄甚切齒遂募悍匪三日得六十人由上流偷渡
直抄撲官軍後營時昏黑軍士不辨賊多寡無敢
戰者遂潰趙克勦獨揮親兵出戰趙身中數鎗陣

卷之二
十一
亡同死者數十人何雲章遇救免州牧聞報知事
不濟遂旋師謀招練再進後狎匪使人納款於安
順府事遂寢

庚申十年三月鳳凰山等處苗民作亂知州毓崐討
平之

鳳凰山鹿尾坡等處俱苗寨有苗監生熊正興者
素狡黠自稱有異術每念咒以柳條擊人輒殺之
取石擊壁壁立破各寨苗民惑焉遂謀爲亂至三
月初值場期鄉民方集忽人聲鼎沸則苗民千百

結隊至聲言攻城民驚潰踐踏無算州牧毓崐聞
變率眾登陴禦之見苗民均執柳條取石遙擊城
手無軍器其苗婦攜男負女不下數百毓崐大笑
曰此惑於妖術耳督兵勇數十人開城奮擊之苗
民等猶口中念咒而斬獲已數十矣遂奔拘獲者
問狀乃悉前情卽飭役往捕其首熊正興至斬之
各處苗寨逃匿一空附近脅從者每畏罪自經飭
役四出撫之皆復業

辛酉十一年春髮逆入境統領周學桂入援

髮匪攻安順爲統領周學桂所破竄定南把總熊起鵬擊退之遂趨平遠時平城守備單弱人情震動州牧夏成業賫文告急於學桂時學桂統大軍亦追至定南欲入城熊起鵬閉關拒之語學桂曰賊趨平遠危在旦夕公今日往定南賊明日圍平遠矣學桂曰軍士困甚曷稍住起鵬曰平遠望公如望歲此非公所往也不敢承命學桂遂督軍前進一晝夜馳至城賊以繞道反居其後遂不敢進遙紮於鳳凰山等處城中恃有援兵眾情稍定學

桂乃於南關外紮連營以拒之

賊襲以邠架遂移營距之

以邠架鄉勇曾破楊濬洗意頗輕賊常集團以待
派勇士數百守險隘賊偵知分兵前後夾擊前軍
誘戰後軍襲之鄉勇大敗死傷百餘人塲中老幼
婦女均未移避遭害財物盡空賊移營踞之分據
茶店等處

統領周學桂鑿平城外濠

學桂與紳耆等闕城指謂紳耆曰城卑而勢坦便

於攻卽不便於守使賊蟻附以進城危矣不如鑿濠護之眾以緣城居民雜遝恐行之招謗學桂曰必有城而後有民居我一時任其怨將萬世享其利耳乃飭兵丁備鍬鋤連日開掘寬深各一丈旬日工竣學桂約紳耆視之喜曰我爲若城作萬年險塹也其後賊攻不能近城賴以全居數日卽率兵進勦民皆焚香跪送兵次八步賊遂遁繞道出天生橋窳畢節學桂由大定進援是役也南北兩路惟以那架被創最重餘未蹂躪州人感之建祠

祀焉

壬戌同治元年穿青民及攏損作亂

先是道光二十八年歸集界土目安廷佐與安廷倫等爭產鬬名曰打攏號矛桿長者曰攏損短衣大褲寬三尺曰攏損客各聚眾數百相攻死傷甚眾副將鄂清率兵往捕二目匿不出遣人誘之始獲解府監斃餘匪遁匿後復糾眾燒香結盟標大五等名號所至一以拷磕劫掠爲事時平遠有穿青夷民尙巫教喜爭鬬自攏損名起皆翕然

從之。又有道人至寨中，詭言大劫將至，云寶洞中有兵書寶劍及金銀軍裝等物，因率眾於石洞中煉神，謂神將附身，能知寶洞所在，百餘里民悉附之。聚眾愈多，殺掠四起，遂與免塲老鳴車等處，損匪約為亂，漢民被害甚多。

十一月，土目楊蔭棠藉故聚眾，知州龔秉琳諭散之。土目楊蔭棠素橫藉備亂，擁眾滋擾鄉人，畏之愈傳，其有異謀。知州龔秉琳命舉人胡承義、武生李玉堂諭散之。

同治癸亥二年春損匪擾補路胡承義單騎說退之
時楊蔭棠仇家密招損匪欲襲蔭棠而損匪遂乘
間擾烏卜白泥等處漸及補路知州龔秉琳率隊
親往先命承義單騎入賊巢責以大義譬曉利害
賊氣阻退出河外龔牧還

五月閩首劉崇興戰損匪於鷄場不利遇害

先是葉琳回城時命府經彭春榮舉人胡承義督
圍首劉崇興進紮鮓瓦鷄場豫防損匪損匪果復
變崇興戰屢捷不爲備一日黎明賊突至眾猝不

能禦皆潰崇興猶手及數賊賊圍之遂被難同遇
難者十餘人賊勢益張

損匪攻阿弓壘知州龔秉琳遣五品軍功田占元往
援大破之

阿弓壘險壘也賊屢攻失利因圍之高姓遣人告
急州牧飭田占元往援占元率兵練數百馳至登
高覘賊謂左右曰賊雖多乃烏合耳若少挫其銳
可立破也分兵爲左右翼自持長矛大呼擊之賊
大破斬首數十脅從者皆反戈殺賊賊喪氣退紮

河岸圍解

把總熊起鵬委員王作賓等破損匪於躲兵洞

知州龔秉琳飭吏目王作賓把總熊起鵬帶兵勇
數百進勦札諭土目楊德昌楊光熾等協辦至白
泥塘遇賊屢破之前後斬首二百餘級損匪退紮
躲兵洞兵勇攻不克王作賓熊起鵬乃親督戰環
攻之賊炮急塵飛石如雨注兵稍却圍三日夜賊
藥盡官兵急攻克之擒其首廖狗崽並餘賊伏誅
損匪張二龍窩退紮納雍河外

夷目湯澤長追勦搃匪破之進勦納雍

前王作賓與眾不協龔秉琳委湯澤長代之進勦
吹隴一帶斬賊四百餘級復紮大灣又斬首百餘
級賊望風遁湯澤長飭兵勇紮河岸謀勦納雍納
雍者前臨大河後巉巖百丈中寬三里許長十餘
里隘口甚險張二龍窩踞之自守不出相持半載
不能成功遂還

苗逆進據兔場

初水城地屬有苗女曰仙姑者以術謀生設壇於

洞中書符請神以愚人利令凡入教者各出資爲
事神費功成日神必報萬金苗民惑之從教者益
衆各寨相傳潛聚洞中鍊術踪跡詭密風聲漸播
守令慮爲變嚴禁之差役四出恣其詐虐時擄匪
乘此機會遂肆敲磔凡係苗民自以在教悉遭害
苗民遂相約作亂始僅數千人盤踞水城屬白謙
繼則聞風相附遠近數百里皆響應數月之間衆
至數萬郎岱屬夷稱賢亦聚衆數千同時蠢起彼
此聯絡紫但家狗塲勢甚披猖遠近莫撖其鋒永

安協鄂清帶兵進劔敗績賊鋒愈銳沿河悉被蹂躪州牧夏成業乃札武舉譔厚載士千總楊德昌齊西路團防堵河口故平屬尙未擾害及辛酉間二賊始合爲一移紮水城屬米樂稱爲大堂官二堂官三堂官等名以稱先生爲尊以廟宇爲殿據一方時出劫掠至壬戌我州以洗滌擯匪未暇西顧賊眾遂拔大隊直踞兔場聲勢甚大村民皆聞風移徙入壘硯自保

苗逆陷安家壘

聖爲安土目所居三面懸岩峭壁如削惟東北面
有山毗連賊卽伏山石後以鎗炮擊聖中更以數
賊伺旁窺守陴者少却數賊遂躡身上殺數人守
陴者悉竄賊眾蟻附而上鄉民跌巖墜澗無算僅
鋒及者約三百餘人

苗逆陷李家聖

聖距河上危峰崛起壁立如刀截賊仰攻不能克
乃潛至山巔取大筐載石人居其中繼至半山運
石擊聖中又令人潛踪至聖外俟之筐中石如雨

注守陴者不支方退未外顧而賊已登陴矣

苗逆陷王家壘

壘奇險賊難攻襲乃掘地道至巖脚實以火藥轟之壘中山崩人畜俱死壘亦失前後凡破壘二十餘死者三四千人或明攻或暗襲或誘以和無不克殺戮極慘

苗逆襲黑沙馬場悉屠之

場中漢民百戶每賊至率拒戰屢勝賊怒集大隊攻之嘑唇四嘯聲若山頽聞者膽落甫戰即走賊

逐之皆獲塲中男女屠幾盡其壯者脫三五人而已

苗逆陷猓結碕

碕口最小數步外蛇行始能入中甚黑雖萬人不敢近賊攻不克乃以柴草堆碕口燃火薰之一日夜碕中民皆薰死牲畜亦無一活者

甲子三年三月何逆始竄州境鄉紳王尙倫率團練禦之敗績

軍興以來各鄉紳奉札防堵河口有化起塲團首

王尙倫素精明強幹爲丁文誠所推重時方與林
白毛帶練百餘集鄉團防賊會奉札進城賊卽渡
水尙倫聞之星夜赴援率子宗亮宗禹等督團練
與賊戰於化起前之龍溪田壩相持半日殺傷頗
眾雖因人少敗績而化起前後村庄藉以脫難者
眾矣

何二強盜分股過白蟒河進據牛場

平遠四面河界自楊逆倡亂各團奉札防堵興文
里趙克賢令其子進光率義勇數百人沿白蟒河

防禦何逆至不獲渡潛往下流落圈巖作竹筏以
濟遂紮牛場

何二強盜分股圍牛場壘圍眾擊卻之

初丁寶楨之家居也以牛場去城七十里民居雜

還恐倉猝有變不能禁乃捐資數百金擇宣慰故

巢修牛場壘依山築城因地鑿池池容水數千担

以備不虞復自捐谷租二百石存公倉爲貧丁緩

急之資以故窮民亦無二志避居者凡數千家何

逆初至志在必得此壘乘勢急攻不克復走馬緣

聖以覘而峭壁千尋無間可擊惟小東路稍平次
日親督賊數千奮攻賊鎗甚利所指處無虛發守
陣者不敢俯視賊漸逼將不支幸後敵樓上炮中
賊數十人斃賊首一何逆始退立馬於石了口揣
視良久退謂賊眾曰彼腰巖處無牆堵人俱露立
可火而走也次日遂以火攻人隨火上鎗發如雨
眾被創甚漸潰賊乘勢搶至炮臺執炮者逸山頂
哨軍急以千鈞大石摧壓之聲如山裂賊驚下眾
始復集運門板及大棹數百張蔽賊鎗賊始退

知州笄佐堯遣田占元援牛場不克退紮小虎場

賊攻益急堯申告急於州牧笄佐堯遣田占元率
練四百往援爲賊阻不能進與戰不利乃退紮小
虎場

復遣團首周國泰援牛場堯不克

堯申告急疊至州牧笄佐堯命團首周國泰率練
數百繼往時遍地俱賊無路可進周國泰亦與田
占元同紮小虎場

何二強盜分股陷阿塊弓堯

圍首楊朝雋與眾不協別居阿塊弓壘牆堵卑淺
夷民雜居何二強盜分隊往攻賊鋒甚銳鎗聲一
發守陴者哭夷民先奔賊遂一鼓陷之朝雋殉難
四月署鎮甯州畢大錫援平何二強盜移紮八步牛
場圍解

賊圍牛場壘已久州牧笪佐堯謂紳耆等曰牛場
壘乃平城一臂不得坐視曷請援時畢大錫防堵
喜樂坪遂賫文往大錫許之率練千餘至平民皆
焚香迎於道賊聞風解圍移紮八步畢大錫屯綺

陌力圖進勦合田占元爲後應至長沖口與賊戰
賊漫山遍野至大錫兵寡少却適田占元亦至橫
擊之賊乃退

鎮甯州牧畢大錫擊何二強盜出境

賊擁重資軍無鬪志大錫三戰皆敗之賊遂由東
路遁去

苗逆踞鳳凰山官寨畢大錫擊退之

大錫甫收兵旋平適報苗逆進紮官寨紳士復請
往勦大錫曰苗逆在平心腹之患不大剗不知畏

然能爲我籌萬金餉乎紳士等以募練防城費多
費不能殺一賊聞大錫言皆喜諾大錫乃統大軍
出戰至官寨大敗之次日謀直搗賊巢部分已定
賊偵知設伏待大錫率兵至賊巢寂無人知申計
揮軍退兩旁伏起鎗炮如注且戰且退沿途皆伏
而官軍奮勇賊不敢逼大錫回城誓滅此賊自往
鎮甯籌餉遣軍功黃敬一廩生藍錫嘉往定南籌
糧接濟振軍再進苗逆遁紮白泥

畢大錫進勦苗逆軍屯大漁塘田占元陣亡

鎮甯糧餉陸續運至大錫派土千總楊德昌爲鄉
導往白泥進勦苗逆屢遇皆敗田占元被炮陣亡
軍至大漁塘連營三十餘座環攻之苗逆不能出
有損匪羅祖德以數百人投効大錫合紮先鋒子
營敗於苗逆死傷殆盡大錫謂左右曰逆鋒銳甚
未可力攻惟持久以困之糧盡必斃乃飭諸將勿
戰

十月畢大錫調知安順府遂赴任仍留師於大漁塘
自秋徂冬賊不能出先是大憲調大錫知安順府

以賊未平辭會檄又至大錫以平遠支持日久糧
餉難濟乃往接印蓋欲合七屬之力以平此賊也
爰飭諸將嚴守曰吾不過二十日返各勉之衆諾
大錫始去

十二月楊有才作亂以苗逆攻城副將梁正春禦之
畢大錫赴任諸將皆驕橫不遵約束其悍將楊有
才與苗逆通引賊以攻中營拔之諸將膽落各解
散苗逆遂與有才謀襲城遣有才先至爲內應州
民廖玉忠馳報及有才奔至城聲言請糧知州馬

樹清知其詐令閉城禁其軍出入有才至城中紳士等欲誅之言於樹清曰誅亦變不誅亦變將如之何樹清曰誅之而變隣於激彼有辭矣不若俟其自變因善言撫之給夫役數十人令還安順次日有才至鳳凰山論諸變夫將變之役夫乞曰願生還爲內應有才悉縱之歸及至攻城知內應不諧乃紮南關外苗逆數萬亦至東南路紮營十餘座日夜環攻不下乃於南關外掘隧道將逼城役夫遽至以聞副將梁正春急於城內掘深溝用水

浸灌以截隧道並合軍士築木城於內以防之屢
率兵圍出戰俱不利遂嬰城自守賊隧道既成以
火藥實木棺內置隧道中接引竹竿爲綫從外燃
之火不勝水藥力倒施城竟無恙反轟斃苗逆十
餘人賊計阻東關外有石碕中居數百人賊薰之
皆斃舉屍擲巖下纍纍而墜守陴者目擊之皆切
齒防守愈嚴王全張老七二十餘人謀爲內應梁
正春悉捕斬之苗逆計遂阻

軍功蔡文炳文童楊之杰熊練目來援遇難

時文炳之杰居茶店局聞警卽集鄉團數百募義
勇二百星夜來援黎明至北門外登高樓與賊接
戰不勝熊練目陣亡蔡文炳楊之杰皆被賊擒不
屈死苗逆屢攻不能克遂遁

盡燒城外民房

副將梁正春知州馬樹清以東南城外皆民房賊
據之鎗炮無所施且就中爲隧道恐復被其算悉
令毀之於是東南城外民房殆盡

貴西道鄧爾巽援平師次河外

官紳稟請援兵時委鄧爾巽復大定先援平軍次
斯挪河外賊退乃至平日需軍糧二十餘石時米
價每斗值二金州人苦之復截收幫款以作軍餉
城防由是無出民苦益甚

乙丑四年正月何二強盜分股渡秋杪河陷四甲壘
壘距城百里謝姓以其族最強相率居之合丁壯
者紮子營爲犄角勢賊攻壘子營救護賊敗去何
逆至謂眾曰壘之精壯必萃於子營拔其子營壘
可破也遂併力以攻營中數百人被創者已十八

九立拔之復攻塋三日夜無休息矢石俱盡人力亦竭塋遂陷死者千人

二月何二強盜分股陷畫眉塋

塋臨歛渡河巉巖千仞中容萬人居者數千家倉儲蓄積頗饒富以其極形勢之險也惟汲道去塋少遠何逆由四甲往攻不能近後偵其汲道所在乃紮連營以困之塋中故未鑿池三日內即渴甚令人夜縋而下竊取河水賊知設伏突起殺之死者六七百人汲道遂斷杯水值銀數兩又作布篷

平定州志卷之二
以待天雨會晴久牲畜渴死數千乃令人偷出求
援約賊退日盡出所有疇勞於是大虎塲徐仁壽
等招集二千餘人往援行至大水厰賊聞大恐將
謀走器械馬疋收拾以俟會賊營告奮勇者數百
人冲突上前甫接戰陣脚遂移兵紛紛敗走賊追
殺數十人援遂絕賊攻約四十餘日塲中困甚乃
議和何逆僞受之誘以買牛故低其價塲中初不
爲計即日買三千餘頭賊漸入塲遂失墜巖者數
百人被害者千餘人何逆由龍塲出境

三月副將梁正春擊破擯匪陳有梅誅之遂降李大

斗

北路擯匪陳有梅與李大斗聚眾千餘相聯絡燒殺劫掠與城相逼副將梁正春與吏目湯澤長千總楊鳳鈞紳士陳謨率兵練勦之初攻陳有梅聖不數日立破之有梅就擒伏誅遂攻李大斗大斗初納款梁正春不受曰此賊亡在旦夕耳連十餘日不能下會城中連函至營以東路苗逆逼近請旋師正春始欲招降派邑紳彭壽椿單騎入其營

陳說利害責以忠義許其降大斗知壽椿素任俠不輕然諾乃皆羅拜曰公導我降實生我也遂下壘降梁正春令帶所屬數百人至城謀勦苗逆

四月副將梁正春大敗苗逆於戈仲烏

苗逆圍三甲碕告急至梁正春率李大斗往援苗逆遁走戈仲烏梁正春令軍士邀截合戰於戈仲烏苗逆大敗斬首數十獲其牲畜數百賊逃走往

鎮甯州屬之赶壩

五月苗逆竄大虎場副將梁正春敗之

苗逆窳大虎場四十甲等處蕎麥被其掠盡圍首
徐龍章率義勇百人擊之追至賊巢賊奮出禦之
大敗還乃請援於副將梁正春正春適至牛場聞
報馳往以李大斗爲先鋒進紮虎場苗逆仍出小
新場擄掠梁軍突至合大斗等橫擊之大捷賊盡
棄所獲追殺數十人生擒十餘名以歸初正春至
牛場墜有練首周景山蔡大儒爲人所控正春愛
其勇力責以立功續罪及出戰正春撫其臂曰此
正汝贖罪時也二人奮勇直前所至披靡手及二

平遠州志 卷之二
十餘賊眾軍繼之遂獲全勝

李大斗與苗逆戰於小新場被害

梁正春因公旋平留將官馬盛標王萬年等及李大斗守營賊敗去以殺傷頗眾振隊復仇仍至小新場設伏以待大斗恃勇與馬盛標王萬年分隊約爲後應自率本部由大路會賊交鋒賊接戰鎗矛鑽刺大斗無畏志賊却退大斗揮眾乘之眾恐有伏大斗不信追奔里許伏突起大斗中鎗陣亡軍練死者數人師大潰賊追奔數里幸馬盛標王

萬年等援兵至賊乃止梁正春聞報合收軍回城

得國進勦

五月貴州提督趙德昌大敗苗逆於小新場

梁軍既退苗逆移紮小新場就食各處蕎麥會大霖雨趙德昌奉調克復大定黔西路經獐狍壩遇賊德昌揮眾大戰自晨至午賊大潰殺傷甚眾賊乘夜遁回鎮甯州屬補郎

七月苗逆酋岩大五入境紫龍場化起

四鄉壘砮被岩逆攻取殆盡由是百里無人蓬蒿

塞路

知州段紀傳徵秋糧以濟公用

時賊竄擾六里荒蕪州牧段紀傳乃親行徵收至
牛場墾月餘畧有所獲以賊逼城遂還賊退復徵
收城內能納者甚寥寥約城鄉所獲不過數百金
而已

十月知州段紀傳調興文里團首護城

許大八窺擾孤城其勢岌岌防守困憊州牧段紀
傳乃札調西路敦八甲得力團勇護城屯東關外

十二月許大八襲城副將梁正春圍首袁克彰擊走之

軍興以來各門於守陴外立中團一隊選丁壯五十人充之隊有長無事駐城樓有警則荷戈相從因賊時入境擾亂無常防守經年遂漸弛許逆自小東門城堞偷上沿燒城棚十三座並城根民房數間圍首袁克彰聞報馳截於馬道上身當其鋒頃刻中七傷梁正春率兵丁繼至衝突上前亦中賊矛幾跌勢將不支適大東門中團復進正春督

率國眾冒煙突火力擊之賊始踰城遁奪獲器械
父矛數十件雲梯十餘架城危復安嗣柯進培復
擊賊於跨木斬首十餘級賊敗去

丙寅五年歲大饑逆首許大八趙缺嘴入境

時賊鋒遍境六里牛畜輒被擄耕種俱廢米糧皆
販之安順每斗值銀二兩民采野蔬食饑死者相

枕藉

二月許大八襲城却之

時四鄉米糧無多其有糧之家搬避壘嗣許逆入

境至涼水井掘得民間窖糧遂置雲梯數十架將
襲城有鄉民繞道報知城中有備賊由西門炮臺
緣梯直上塏丁奮力擊之賊受創退走奪獲雲梯
十餘架

知州蕭培基副將梁正春討賊於白羊塏失利

白羊塏穿硿等處爲北鄉精華積糧尤多屢被賊
圍告急於城蕭牧諭紳士胡承義傅桐彭壽椿前
往聯團援之並諭北路紳士陳謨出辦軍務時梁
正春率王萬年馬盛標追賊紮把步塲聞報移營

會勦與賊戰於白羊壘陳謨亦挑選勁旅齊集正
春揮眾衝擊鎗矛並施壘中時以大炮相應自辰
至酉賊大敗追奔十餘里奪獲器械旗幟甚多後
把步賊援至皆死戰眾不能敵退守壘中嗣聞另
股賊逼城蕭牧還平白羊壘穿碣遂相繼失

三月巖大五襲白羊壘據之

四月巖大五陷化踏壘及王家壘據之

化踏壘距城東三十里賊襲破之資其糧遂據焉
王家壘與化踏壘相隣有土棍高五大頁宋官玉

等聲言能保壘拒賊眾皆倚重且給謝銀若干宋
高等竟與賊通來往賊由是得入壘據之

五月知州蕭培基調團首劉汝珍周廷鈺攻王家壘
時賊勢披猖據王家壘知州蕭培基乃調劉汝珍
等率所部練軍數百人進攻苦無軍糧乃親至馬
家庄等處捐派民糧以濟軍食至是富者亦爲餓
殍矣

提督趙德昌委先鋒胡鳳祥池有蓮熊源等援平
化踏王家壘及北路穿硿一帶皆賊營去城始三

十里賊眾不下數萬攻襲無常城中甚惶惑州牧
蕭培基乃請援於提督趙德昌德昌遂委胡鳳祥
等援平

副將田祖德吏目湯澤長及熊源攻化踏聖不克

胡鳳祥池有蓮進北路惟熊源與田祖德湯澤長
攻化踏聖然賊鋒銳甚每戰均不利而還

團首周廷鈺劉汝珍與賊戰於阿者跨賊遁

知州蕭培基親至軍營督戰廷鈺及汝珍等俱欲
爭功及出戰遇賊於阿者跨賊奮勇死戰我軍少

却周廷鈺持矛獨立賊畏之不敢進遂奮力鏖戰
自辰至申各死傷相半賊乃退去遂圍大麻窩諸
壘

逆酋岩大五等陷麻窩壘據之

諸逆圍十數日壘中求救於州州牧委團首趙克
肖往援肖率百餘人冒圍入賊甚眾不敢戰遂還
不數日壘陷賊據之

七月苗逆襲破牛場壘據之

苗逆原紮補郎後以趕壘據之以牛場壘素險

未敢攻惟許遊岩遊等屢攻襲均不利還故壘中
每不爲意官兵相持日久守備亦怠苗遊乘無備
襲之及山頂不敢下先舉大石摧壓之壘中知賊
至號哭聲動山岳有膽識者諭眾止哭奈人心驚
惶勢不能禁遂開壘奔潰婦女俱撲壘中大塘塘
爲之滿墜岩者數百踐踏死者亦數百比天明賊
下壘追殺千人大股繼至見壘中形勢要害悉眾
據焉賊每破壘嗣運糧以實之欲爲長久計自書
眉壘及牛場壘失平遠精華殆盡

逆酋楊僞元帥轉紮大虎場

先是許逆岩逆等屢困牛場塹明攻暗襲俱不利計無所施及聞苗逆竊取遂相約攻之與戰不能勝會盟還楊逆分任虎場誘各處降

八月官軍及團首劉汝珍等攻賊於麻窩塹

苗逆據牛場塹許逆等據麻窩塹蕭州牧先欲擊諸逆後圖蓄逆飭吏日湯澤長團首劉汝珍等移營攻之屢出戰俱有斬獲賊選丁壯以衝之汝珍揮眾奮擊殺賊十餘人賊敗去後軍士爭掠輜重

陣大亂賊還攻師遂敗諸軍皆拔營回

虎場躲兵弼擒楊逆弟僞二元帥解至城伏誅

楊逆誘各弼相從各弼以乏糧故僞從之徐子光
周子蓮誘楊逆往招躲兵弼欲就擒之楊逆陰懼
不敢令其弟率數人行至弼中徐周等俟其醉而
縛之解至城伏誅

十一月岩大五襲城至馬道紳團擊却之

賊由西門二嶺岡偷上躲丁王老么劉興林陳元
清奮力擊之中圍繼至奪獲器械十餘件賊被創

始踰城遁越三日又偷上北門水關堞口有十餘
大漢賊占踞女牆殺傷堞丁八人燒城棚一處守
城紳士傅桐陳應台等督飭團眾劉成忠何奎章
先以強弓攻殺數賊中團鎗矛隨至由馬道兩頭
夾擊賊不及尋梯倒翻城而去

岩大五攻陷了口壘

壘在城東北隅距城五里岩逆圍城俱由此經過
壘中人與城守約賊過放炮爲號故屢次圍城俱
有備賊啣之盡力攻壘中施滾木擡石不能進乃

於夜四更時偷踰堊牆放火草棚皆燃光焰燭天
賊乘亂而上被殲落岩死者數十人餘皆逃散此
堊陷後城防愈緊

知州蕭培基嚴城防調團來援

岩逆圍城久無去志副將田祖德日令王萬年等
督帶兵團與賊接仗不利高文選等陣亡十餘人
州牧蕭培基乃調各團來援蕭牧自丙寅二月接
事至丁卯六月卸篆督率紳團防守年餘衣不解
帶雨雪無阻雖除夕亦不回署故人以此用命獲保

孤城皆其力也

十二月鄉紳陳謨國首劉汝珍及兔塲何定功帶團來援擊岩逆退

陳謨劉汝珍先至屢戰於南關外互有勝負兔塲團至大戰於較塲不勝三人相約以陳謨劉汝珍與賊接杖兔塲團卽乘間營於煙墩坡營成賊傾巢而出屢戰不勝乃遁去

丁卯六年歲大饑

賊蹂躪屢年民不聊生村鄉中每取枯牛馬革而

食往往有食人者

二月湯澤長鄉紳陳謨團首劉汝珍攻牛場壘

初馬捲壘及那巴硎爲賊屢攻力不支遂順賊爲
保家計賊去蕭培基往撫之獲糧數百石以資軍
食乃飭吏目湯澤長及陳謨劉汝珍率所部練往
攻牛場壘俱營於沙子哨以禦之

吏目湯澤長及陳謨劉汝珍等與苗逆戰不勝退還
苗逆時出諸軍截之苗逆率眾環攻擊以大炮諸
軍力不能支各相繼還

四月岩大五復襲城及馬道中團擊却之

苗逆往麥桿窰距城百餘里乘夜突至視城上人
睡靜由小東角偷上數十人中團高文秀等先覺
偕眾截於馬道上賊攢刺之文秀中八矛殊死戰
中團及兵丁繼至矢石俱發賊不能進始踰城去
奪獲雲梯器械無算文秀傷重亡蕭培基奠之以
其弟亦禦賊亡輓以聯云難乎爲兄繼介弟以捐
軀就義存仁回看雙堰塘東一片傷心風月冷幸
哉有子先嚴君而禦敵作忠移孝遙指梓潼閣畔

千秋快口姓名香

四月雲南巡撫劉嶽昭委統領吳安康謝景春先鋒
吳奇忠援平

劉嶽昭大營在黔西聞苗賊盤踞牛場壘欲勦之
州牧蕭培基以糧餉支絀具稟止之劉不許合吳
安康等率兵萬餘至

六月委辦軍糧馮澍署平遠州事

澍接篆後果後營兵勇萬餘勦牛場踞匪需糧甚
鉅運夫尤繁乃於艱難籌措外委興八甲團首辦

糧千石陳謨辦糧柒百石以資軍食於茶店設立
夫局轉運雖至極難支持從不取諸民間先後與
大營借千金辦理軍糧克濟終平巨匪皆其力也
又於軍務倥偬之際表彰節孝建尙節堂捐貲諫
士寬籌賓興是科丁卯中式三人而除奸緝暴尤
推神明士民感之

吳安康吳奇忠大敗賊於楊柳河追至牛場壘圍之
吳安康等率兵勇至楊柳河欲結營苗逆突至遂
大戰破之追至牛場壘紮連營合圍以斷其道賊

戰復敗閉壘自守諸軍驟攻不克因築長圍困賊
賊糧盡整隊出復擊敗之於是晝則固守夜令人
越山嶺四出覓糧官軍故縱其去伏於隘待歸突
起攔截無不獲賊糧道遂斷始殺牛馬爲食牛馬
盡至殺人而食

九月吳安康吳奇忠謝景春復牛塲壘

官軍圍數月攻勦皆施賊糧盡餓死者相枕藉瘞
疫驟起死者尤眾乘夜由間道遁及官軍覺破關
入惟老弱及病餓者尙存盡誅乃還

戊辰七年十二月餘匪竄西北路

時賊屢旣去鄉民俱下重碕復業不防黑苗餘匪突至順西北路大肆擄掠

己巳八年正月餘匪竄東路一帶知州馮澍會都司馬盛標追之不及師還

賊由北而東鄉報以聞知州馮澍親與都司馬盛標出追之賊旣遁不及而還

十二月餘匪竄熊家場把總馬雲標等追之敗還雲標等每輕視賊據必勝之勢率兵丁追至半途

遇伏死傷十餘人而還

庚午九年七月苗逆踞納雍餘匪復擾東路知州陳昌言請兵勦之

苗逆原分股紫水城屬旣爲黑夷以都等勾結攻損匪張二龍窩損匪敗死苗逆遂踞納雍時出劫掠河內民受其害知州陳昌言接事適黑苗餘匪復窺東路乃稟請駐防楊安邦率新字營護城復集紳耆議防勦之策眾僉曰請兵必籌糧今糧無出恐不足濟軍食不如靜守以待陳牧曰吾固知

糧之支絀特以四鄉當兵燹之餘如人體尪弱恐不能再經重病今苗逆踞於西流賊擾於東是困我也坐而待困不如伐之且靜守云者不過目前苟安計設賊四路擾盡至秋收而掠之諸君欲自安得乎一勞乃可永逸勦之爲便遂力排眾議申文請兵上憲委王恩貴率幹字營至平適川防禦安邦帶新字營轉黔西復委李榮春署平遠協以春字營至

知州陳昌言飭王恩貴勦東路餘匪平之

餘匪流竄朝東暮西靡有定處陳牧飭王恩貴率
幹字營追之恩貴與都司王萬年於平遠鎮甯交
界處地名下茶率眾奮擊恩貴身犯矢石所向披
靡斬首二十餘級賊敗去自是賊望旗幟輒引避
流賊遂平東南民困少蘇然其時牛畜殆盡田土
荒蕪值邑人丁寶楨巡撫山東陳牧乃與紳耆稟
請寶楨總發牛種以濟民困寶楨函知上憲撥東
餉四千自捐廉六百散給川民由是民間始有桑
麻之樂復修書院培植人材文教初興元氣漸復

知州陳昌言移會幹字營王恩貴副將李榮春並調
北路團首陳謨進勦苗逆

署副將李榮春帶眷字營至陳州教乃飭北路團
首陳謨移會幹字營王恩貴各率所部並李榮春
三路進勦初素三塘合候選訓導彭壽椿彭常懼
辦理糧務軍勢大振

苗逆圍大憂桐叅府王恩貴圍首陳謨及副將李榮
春大敗之

賊初攻馬樂及小桐皆以柴草積礮口燃之以火

石人畜俱爲烟薰斃米糧財物盡爲賊有將及
於楊德昌硿時廩生張汝楫以訓讀居硿中豫與
德昌謀曰賊連破數硿必及於我曷豫函知隣硿
爲請援計不然恐賊至不能出矣德昌從之未幾
賊果至仍以火薰之硿中有風烟不能入隣硿持
函報王恩貴率眾先進春字營及圍眾繼之賊知
援至振隊出迎兵初交王恩貴見賊鋒甚銳馳入
陣以鎗斃賊數名後軍繼至鎗炮如雨苗逆死者
甚眾遂奔潰王恩貴策馬逐之眾軍競進生擒二

十餘名斬首七十餘級解圍還次日進紮阿奶護
雪敞坡等處賊屢出戰皆破之斬獲無數王恩貴
復紮河中沙壩緊逼賊營賊懼乘其營未定分隊
攻之恩貴督練奮斬賊首一級從賊數名營崩賊
不敢出

十二月苗逆納降師還

官軍圍月餘賊糧道既斷遣使稟水城廳願納款
於大定府呈繳刀鎗投誠大定府許之先是大定
府聞進勦之機初不許及知州陳昌言力主之始

委提標前營遊擊何定功相機進勦與賊戰不利
退紮老凹車及平遠功垂成而苗逆降書適至大
定府卽函知陳州牧令旋師州牧得書諭三營師
還苗逆由是投誠至次年武字營乘其不備直搗
其穴鎗炮軍器悉收入官苗逆等遂解散平遠十
數年之患一旦盡除

辛未十年知州陳昌言以幹字營駐防牛虎二場
幹字營王恩貴至平屢破賊有功軍令嚴肅陳州
牧乃稟於上憲委其父王世昌署平遠協以其軍

分紮於牛虎場等處爲駐防由是民有所恃各鄉
場人烟漸布民安其居耕種初興衣食稍能自給
壬申十一年改鳳西書院爲文騰書院

知州陳昌言以鳳西與鳳兮同音非升騰之兆故
易之

甲戌十三年署知州錢堦始行招耕

太子少保頭品頂戴山東巡撫丁文誠公請

旨省墓回平見平城時勢多艱非理繁治劇者不勝任
乃與上憲商委借補威甯州錢堦署平錢州牧言

於文誠曰平遠孱弱極矣然尚有可爲者以宮保
在耳因請再給牛種文誠知其振作有爲許之商
於上憲撥東款二萬五千以濟墾治平由是政刑
肅然自士庶以及書役皆使有以自給開善後局
辦理善後以四方地廣人稀稟上憲招耕上憲許
之乃遣局紳彭常惺胡承信招蜀人數月間至者
數百戶每戶給銀三十金初年開墾着納租穀若
干至次年以是而增限十年外准其移徙東路一
帶荒蕪遂漸闢焉

前甘肅提督陶茂林駐防平遠

前駐防幹字營於癸酉間去平文誠至以地廣人
稀恐復有草竊者乘機竊發乃商之大府奏調陶
茂林帶平定營駐防以資彈壓茂林令軍士紮東
路以通進省大道沿途爲旅舍以便行旅由是仕
商無露宿饑餓之苦民便之及川民續至人烟漸
廣遠徙者亦聞風而歸

築礪於上水關及小東門外

州牧錢堉閱城謂紳耆曰時雖承平不可無備若

上水關甚難防範使賊併力於此何以禦之且小東門一面地坦城低屢年賊徒多由此偷襲不如築礮護之萬一有緊可無東顧憂乃親相基址命局紳彭春榮督工一在上水關外題曰砥柱安瀾一在小東關外題曰平陽半壁不數月工竣以石爲圍間道與城相埒軍士由城垣進礮不從外人布置尤爲嚴密

乙亥光緒元年重修五城門樓

州牧錢燠以各門城樓勢將傾頽乃稟請重修委

紳監工外木石各料皆親行點驗極爲堅固元年
春興工不數月各告竣

重修大堰

堰在城西五里卽雙流激浪一景水自石碕奔流
而出碕口宏敞高數十丈空其中約一畝許碕口
堰基僅存爲北關田水源歲養穀二千餘石修自
國初厥後官民屢修旋潰工資甚鉅無力復舊漑
溉仰給天雨所收減半民甚苦之紳民等言於州
牧錢壩因慨然曰苟利於民何惜多費遂親往相

之以原堰正洪流衝蕩崩潰無常乃於洞口左壁
橫巖漸高處鑿孔穿水以殺其勢壘石成堤逼水
入孔堤外壘大石爲堰廣長十餘丈層疊而下直
抵右巖以固其基自是灌田之水由石孔穿出其
巨流仍由寬處瀉下可無奔騰傾折之患矣至堰
外古溝由西至北透迤十里歷年旣久壅塞坍塌
舊跡僅得諸彷彿因勢利導土石之工幾與堰埒
並修復之溝亦隨堰告成是舉也計用東餉六百
餘金鞏固堅實可垂永久

庚辰六年雲貴總督岑毓英等加書院膏火

書院自知州徐豐玉重修後月課均如額給發膏
火兵燹以來田土荒蕪入不敷出總督岑巡閱至
城乃奏撥鹽款二千金交執事生息資發始復額
癸未九年匪首朱朝品童元輔等在花魚碕月台地
方聚眾滋事官兵擊散之

時有童元輔暨童念青改名佟道人在月台地方
聚眾樹旗起意謀逆經大定府余上華督飭汎團
勦捕奪獲黃旗一面大刀一把存州署並先後拿

獲李苗五等交州諫明朝之而釋被脅之張花三
等二十二名童元輔逃至威甯被獲伏誅

甲申十年重修

崇聖祠

學宮歲久頽壞時鄉紳丁寶楨爲川督捐銀一千
兩重建後宮餘俱補修完善

庚寅十六年重修州志

知州黃紹先以兵燹時防守一切機宜當書以示
後世並士民婦女之忠孝節烈者恐久而湮沒弗
彰也爰爲修纂副廩成書

